



Aqqalu C. Jerimiassen

UPA 2022/121_1

Atassut

28. april 2022

Meeqqat 18-nit inorlugit ukiullit kinguaassiuutitigut atornerlunneqarsimasut, taakkunungalu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffealernissaat pillugu nassuiaasioqqullugit Naalakkersuisut peqquneqarnissaannik Inatsisartunut aalajangiiffigisassatut siunnersuut. Misissuineq periuserineqarsinnaasunik saqqummiussisussaq piviusunngornissaanullu pisariaqartinneqartunik takussutissiisussaq, tamatumani aningaasatigut allaffissornikkullu kingunissai ilanngullugit, kingusinnerpaamik UKA2023-qarnerani Inatsisartunut tunniunneqassaaq.

(Inatsisartunut ilaasortaq Anna Wangenheim, Demokraatit)

Meeranguaq tassaavoq tamani minguinnerpaaq salingaatsaq, tamani iluatinnarnerpaaq. Taannaavorlu uagut inersimasutut illersussallugu tamani naleqarnerpaatut isigisassarput, meeqqap tarninga innarlerneqaruni inuunerata sinneranut ikeq pilersinneqassooq ullussani kingulleq tikillugu.

Meeqqamullu kinguaassiuutitigut kanngutsaatsuliorneq tassaavoq pissuseq tamani amiilaarnarnerpaaq akuerineqanngisaannartussarlu. Meeranguaq imminut illersorsinnaanngitsoq inersimasumit kanngutsaatsuliorfigineqartilluni soorunami paasiuminaattassaqaq, eqqarsaatillu ajornerpaaffiisa nalaattassagaat qularnanngilaq, apeqquut niaquani kaaviiartuartassalli; sooq uanga? Sungamamitaavaana taamaanneqartunga?

Tamakku tikinneqartillugit, misigissutsit sakkortungaartut aliasoqataanerit pilersarput, ingasammik nammineq meeranguaqarluni, qiviaannarlugit qanoq iluatinnartigineri illersorusunnartiginerilu paasinarsisarmat. Tamattalumi meeraqartuusugut isertuussinnaangunanngilarpud, qanoq meeqqatta taamannak aqqusaagaqartinneqassangaluarpata, eqqarsaatit ajornerpaarpaat tikissinnaagaatigut, kamak akiniaarusussuseq allarpassuillu.

Taamaattorli! Tamatta inatsisit ataani inuuvugut, inatsisitigullu tamatta illersungaalluta ajortuliortuugutta eqqugaasuuguttaluunniit. Uagut immitsinnut eqqartuussisunngortissinnaanngilagut, inatsisit avaqqullugit nammineq akiniaanermik kamak atorlugu pillaaniarsariniaartut uagutsinnuttaaq kingunerlussinnaaqimmat.

Kisitsisit amiilaarnaannartumik inuttussuserput eqqarsaatingalugu kinguaassiuutitigut atornerluisarnerit qaffasippud, tamannalu ajoraluartumik takussutissaavoq kanngusuusaarutissartaqaqisoq. Tamassumammi takutimmagu, qanoq inuiaqatigiittut suliaasaqartinersugut inuiaqatigut eqqarsaatingalugit.

Taamaattoq, ullut tamaasa nukiit allarlunnarmut atorpagut, inuit ikiorniakkagut ukkannissai salliutassaraluagut tunulliullugit, inuiaassuserput naalagaaffinngorniarnermullu aningaasarpasuit atortuarpagut. Kina tassani ajorsartuutittarparput?

Uagut Atassummi isumarput malillugu, inuiaqaterput ajoraluartumik ajorsartunngortittarparput, ukkatarinerusinnaasagut inuiaqatigiit akornganni ajornartorsiutit tunulliutileraagatsigit.

Aaliuna qineqqusaartuarternermi innuttaasut meeqqallu qitiutittuarneqarnissaanik nilliaateqartuulluta.

Oqarluartaaruterpassuilli neriunneq malillugu inuiaqatigiinnut orpinnik qorsooqqinnik neriorsuiniartuartilluta, inuiaqatigiinni kivitassagut pingaarnarpaat, sumiginnangaasimasorpassuit, kinguaassiuutitigut atonerlunneqarsimanermik eqqungaasimasorpassuit, inuit ulluinnarni atukkamikkut artorsartut puigortuarpagut. Uffa massa qinertaraatigut, neriuteqarlutik atukkatik pitsanngorumaartut ullullu qaamanerulerumaartut.

Uagulli qinikkat ila immitsinnut aamma qivialaartariaqalivissorpugut, sooruna meerartannguagut eqqartulersillugit taamak soqutiginninnerput appasinnerusartigisoq? Sooq piniangassat eqqartorneqalersillugit aatsaat arpaliutiinnartutullusooq soqutiginninnerput ikittarpa? Piffissanngunnginnerpa eqqumaffigisariaqakkagut pingaarutillit, tassalu nunatsinni naleqarnerpaat meeqqat eqqartorneqalersillugit mattatarnissatsituulli pingaartitsigisassangaluarigut? Eqqsarluarutta pingaarnaq sumiinnersoq tamatta ila nalussangunangikkaluaqaarput.

Tarnip nakorsaaniq ila arlalippassuarnik amingaateqarpugut, Peqqinnissaqarfippu tamaarsorpoq, sulisui ila tamaarsogaat, sullitat naammangittaalliortorpassuupput. Tamanna unammillingassaq ilisimaarilluaqaarput tamatta, misiartoqarsinnaanngillarlu tassani apeqqummi.

Pisussaaffeqarpugut, kanngutsaatsuliorfigineqarsimasooq kanngutsaatsuliortuusorlu tamaasa inuiaqatigiinni iluamik inuuneqaleqqissinnaanissaanik aqutissiuutissallugit. Unali eqqumaffigilluinnartariaqarluni, kanngutsaatsuliortuusooq akuerinngilarput, akuerinngisaannassarput iliuuseqarsimanera. Taamaalioqqinngilluinnarnissaanillu pineqaatissinneqarsimanerani, pineqaatissinneqarsimanerata qaavatigut immikkut katsorsarneqarnissaanik aqutissiuuttariaqarlugu, ataasiaannarmi taamak iliorsimaneq annertuallaareerpoq, tarneq ikilingaq ataaseq annertuallaareerpoq.

Puigunngisaannangassarpulli ataaseq uaniippoq, kanngutsaatsuliortuusooq, naak pissusilersuutaa akuerisassaanngilluinnaraluartoq, sooq taamak iliornera, sunalu tunuliaqutigineraa meeranngumut sussuteqanngitsumut allaat taamak iliorsinnaalerluni paasisariaqavissorparput. Imaassinnaavormi taanna kanngutsaatsuliortuusooq meeraanerminissaaq taamannak iliofigineqartarnikuusimasooq, ajoraluartumillu periusipalaaq ingerlateqqiinnartoora meeraanermini suliarisimannginnerata kinguneranik.

Ataaserli tamatta isumaqatigiissutigisinnaangunarpaput, sullitassarput pingaarnarpaq tassaammat; meeraq eqqungaasooq eqqungaasullu qaniginerpaasaatut inissisimasuusut. Pisartut amiilaarnartut taamak annertutigiuartillugit piaartumik aaqqiissuteqartariaqalerpugut, oqaatiginiangarpulli massakkut Atassummiit ilaatigut inuit ilaanniit iuminaatsinneqartaraluartoq

oqaatigeqqiinnassavarput. Suli annerusumik naalagaaffimmiik ikiorneqarnissarput noqqaassutiginiartigu, tarnimmi nakorsaanik taama annertutigisunik amingaateqartilluta, 100-jut tungaanut amingaateqartilluta inuiattut tulluusimaartuunerput ajungaatinniaannarsinnaangilarput. Qaqugukkulluunniimmi inuup inuunera pingaarnervuq, innuttaasullu qitiutillugit sulisuaannartariaqarpugut. Illit inuunerit, uanga inuunera taakkulu inuunerat, tamatta assigiimmik naleqarpugut. Sumiginnaaneq tamatta akisussaaffigaarput, uanga ilissilu tamassi maaniittusi.

Taamatut oqaaseqarluta, Atassummiit siunnersuut toqqaannartumik ilusaatut isikkoqartillugu taperserparput.